

Apelacioni sud Brčko distrikta Bosne i Hercegovine u vijeću sastavljenom od sudije Srđana Nedić, kao predsjednika vijeća i sudija Maide Kovačević i Ruže Gligorević, kao članova vijeća, u postupku ocjene usklađenosti pravnih akata Brčko distrikta Bosne i Hercegovine, postupajući po inicijativi A. B., sina R., iz B., koga zastupa punomoćnik A. R., advokat iz B., na osnovu člana 2. i 27. Zakona o postupku ocjene usklađenosti pravnih akata Brčko distrikta Bosne i Hercegovine i rješavanja sukoba nadležnosti („Službeni glasnik Brčko distrikta BiH“, broj 45/10) na sjednici vijeća održanoj dana 04.06.2012. godine, d o n i o j e

### R J E Š E N J E

Ne prihvata se inicijativa za pokretanje postupka ocjene usklađenosti Pravilnika o zapošljavanju Brčko distrikta BiH („Službeni glasnik Brčko distrikta BiH“, broj 2/09) sa članom 14. Zakona o dopunskim pravima porodica poginulih boraca i ratnih vojnih invalida („Službeni glasnik Brčko distrikta BiH“, broj 26/04).

### O b r a z l o ž e n j e

A. B., sin R., iz B., koga zastupa punomoćnik A. R., advokat iz B., podnio je dana 02.03.2012. godine inicijativu za pokretanje postupka ocjene usklađenosti Pravilnika o zapošljavanju Brčko distrikta BiH („Službeni glasnik Brčko distrikta BiH“, broj 2/09, u daljem tekstu Pravilnik) sa članom 14. Zakona o dopunskim pravima porodica poginulih boraca i ratnih vojnih invalida („Službeni glasnik Brčko distrikta BiH“, broj 26/04). Podnosilac inicijative navodi da osporenim Pravilnikom nije dat prioritet članovima porodica poginulih boraca i ratnim vojnim invalidima prilikom zapošljavanja, iako je to pravo propisano članom 14. Zakona o dopunskim pravima porodica poginulih boraca i ratnih vojnih invalida.

Postupajući po predmetnoj inicijativi sud je dopisom broj 097-0-OUZ-12-000003 od 27.03.2012. godine u skladu sa članom 15. stav 2. Zakona o postupku ocjene usklađenosti pravnih akata Brčko distrikta BiH i rješavanja sukoba nadležnosti („Službeni glasnik Brčko distrikta BiH“, broj 45/10) i članom 8. stav 8. Poslovnika o radu Apelacionog suda Brčko distrikta Bosne i Hercegovine u postupcima ocjene usklađenosti pravnih akata Brčko distrikta Bosne i Hercegovine i rješavanju sukoba nadležnosti („Službeni glasnik Brčko distrikta BiH“, broj 45/10) zatražio mišljenje donosioca osporenog podzakonskog akta u vezi predmetne inicijative.

Dana 18.04.2012. godine Gradonačelnik Brčko distrikta Bosne i Hercegovine je svojim aktom broj 02-000263/12 od 04.04.2012. godine dostavio mišljenje u kojem se navodi da osporeni Pravilnik nije u suprotnosti sa članom 14. Zakona o dopunskim pravima porodica poginulih boraca i ratnih vojnih invalida, te da je članom 37. istog Pravilnika kroz sistem bodovanja obezbijeđen prioritet članu porodice poginulog borca, kao i ratnim vojnim invalidima i članu uže porodice ratnog vojnog invalida.

**Relevantne odredbe Zakona o dopunskim pravima porodica poginulih boraca i ratnih vojnih invalida („Službeni glasnik Brčko distrikta BiH“, broj 26/04)**

Član 14.

Korisnici prava iz ovog zakona imaju prioritet prilikom zapošljavanja ukoliko ispunjavaju uslove za rad na tim radnim mjestima u skladu sa odgovarajućim zakonom.

Organi uprave u Brčko distriktu, kao i sva pravna lica koja se finansiraju iz budžeta Brčko distrikta dužni su, pod jednakim uslovima, prilikom prijema u radni odnos obezbijediti prioritet članu porodice poginulog borca, kao i ratnim vojnim invalidima i članu uže porodice ratnog vojnog invalida.

**Relevantne odredbe Pravilnika o zapošljavanju („Službeni glasnik Brčko distrikta BiH“, broj 2/09)**

Član 37. stav (1) tačka a.  
(Dodatni bodovi)

(1) U toku postupka intervjuisanja kandidata, broju bodova koji osvoji jedan kandidat pridodaju se dodatni bodovi u slučaju:

a) prava propisanih Zakonom o dopunskim pravima porodica poginulih boraca i ratnih vojnih invalida , tri boda;

Po ocijeni ovog suda ne postoji neusklađenost između Pravilnika o zapošljavanju Brčko distrikta BiH sa članom 14. Zakona o dopunskim pravima porodica poginulih boraca i ratnih vojnih invalida.

Pravo prioriteta ostvareno je kroz član 37. stav (1) tačka a. Pravilnika o zapošljavanju, kojim je propisano da se u toku postupka intervjuisanja kandidata, broju bodova koji osvoji jedan kandidat pridodaju tri dodatna boda u slučaju prava propisanih Zakonom o dopunskim pravima porodica poginulih boraca i ratnih vojnih invalida. Što znači, da je dodavanjem tri boda na ukupan broj bodova kandidatu koji ostvaruje prava iz navedenog zakona ispoštovano pravo prioriteta.

Konačno, sistemom dodatnih bodova pravo prioriteta je omogućeno na način koji je u skladu sa članom 20. stav 1. i 2. Statuta Brčko distrikta Bosne i Hercegovine („Službeni glasnik Brčko distrikta BiH“, broj 2/10), kojim se u duhu načela zabrane diskriminacije i omogućavanja slobodne konkurencije obezbjeđuje zapošljavanje na osnovu profesionalnih sposobnosti kandidata.

S obzirom na navedeno, shodno članu 27. Zakona o postupku ocjene usklađenosti pravnih akata Brčko distrikta Bosne i Hercegovine i rješavanja sukoba nadležnosti, odlučeno je kao u dispozitivu rješenja.

APELACIONI SUD BRČKO DISTRIKTA BOSNE I HERCEGOVINE

Broj: 097-0-OUZ-12-000003

Brčko, 04.06.2012. godine

ČLANOVI VIJEĆA:

PREDSJEDNIK VIJEĆA

1. \_\_\_\_\_  
Maida Kovačević

\_\_\_\_\_  
Srđan Nedić

2. \_\_\_\_\_  
Ruža Gligorević